

【经文信息】大正藏第 14 册 No. 0492a

佛说阿难问事佛吉凶经 1 卷

No. 492a

佛说阿难问事佛吉凶经

后汉安息国三藏安世高译

阿难说：「闻如是。」

阿难白佛言：「有人事佛得富贵谐偶者，有衰耗不得谐偶者，云何不等耶？愿佛天中天，普为说之。」

佛告阿难：「有人奉佛，从明师受戒，不失精进奉行所受，朝暮礼拜，恭敬燃灯，斋戒不厌，心常欢欣，善神拥护，所向谐偶，百事增倍，为天龙、鬼神、众人所敬，后必得道；是善男子、善女人，真佛弟子也。」

「有人事佛，不值善师，不见经教，信意不坚，亦有戒名违犯正律；既无形像，亦不烧香然明作礼，恒怀瞋恚，恶口骂詈，六斋不持，杀生趣手；不敬佛经，持着杂物弊篋之中，或着妻子床上不净之处，或持挂壁无有床坐棚阁，与世书无异。若有疾病了不念佛，便呼巫师卜问祠祀，请乞邪神，天神离远不得善护，妖魅日进，恶鬼屯门，令之衰耗所向不谐。现世罪人非佛弟子，死入泥犁百毒掠治，魂神痛酷不可得言。愚人[梦-夕+登]瞢不能自思，先行无功还怨天地，责圣咎天迷谬乃尔，甚为愚痴，遂为三涂所见缀缚。」

「夫人得道皆从善生，经戒自御心身口，善为大铠不畏刀兵，善为大船得渡河渊，有能守信室内和安。现世有庆福追自然，行之得报非神授与。若人不信不持经戒，后生转剧，善恶逐人如影追形，勿作狐疑，自堕恶道，求脱良难。谛信不犯，所在常安；佛语至诚终不欺人。佛世难值人身难获，汝今侍佛宿福之大，当念报恩班宣法教，广为福田行之得度，所适无忧。」

阿难复白佛言：「人不自手杀，教人杀者，其罪云何？为无罪耶？」

佛言：「阿难！教人杀者，重于自杀。何以故？或是奴婢下贱之人，作无杀意；或为王者县官所见逼促，不自意出为之所使。教人杀者，而知故犯，阴谋残害复罪他人，欺罔三尊还负自然，其罪莫大；怨对相报，世世受殃，未有断绝。现世不安，死入地狱，受毒痛裂，从地狱出为畜生，屠割皮骨以肉偿人，皆由前世残杀暴逆，克贼众生阴谋怀害，无有慈心。见人杀者代其欢喜，以用快意过于自杀，罪深如是。」

阿难复白佛言：「世间人及佛弟子，轻易其师、恶意向师并道德人者，其罪云何？」

佛言：「阿难！夫为人者，当爱乐人德、欣乐人善，不可嫉之。恶意向师、道德人者，是恶意向佛无异也。宁持万石弩还自射身，为痛不？」

阿难言：「甚痛，甚痛！世尊！」

佛言：「人持恶意向道德人与其师者，痛剧弩射身也。为人弟子，不可轻慢其师、恶意向道德之人；道德之人当视之如佛，不可嫉谤。人有戒德者，感动诸天龙、鬼神，莫不敬尊。宁身投火中、利刀割肉，慎勿得嫉谤是善之人，其罪不小。慎之！慎之！」

阿难复白佛言：「师者，为可得呵喝弟子，以小罪成大，得无罪耶？」

佛言：「不可！不可！师、弟之义，义感自然，当相信厚，视彼若己；己所不行，勿施于人，弘崇礼律训之以道，和顺忠节不相怨讼。弟子与师二义真诚，师当如师，弟子当如弟子，勿相诽谤慎莫含毒，小怨成大还自烧身。观世恶人魔比丘辈，师不如师、弟子非如弟子，但共为恶不念行道。沮坏善者贪慕俗业，不计无常积财自丧，死堕恶趣饿鬼畜生，未尝有是相视若牛，于世何求念报佛恩？当持经戒相率以道。道不可不学，经不可不读，善不可不行，行善布德济神离苦，超出生死，见贤勿慢见善勿谤，不以小过证人大罪，违法失理其罪莫大，罪福有证。可畏！可畏！」

阿难复白佛言：「末世弟子生是魔界，多有因缘，有居家之求、身口之累，云何行之？」

佛言：「为佛弟子，虽有因缘持戒勿犯，诚信畏慎敬归三尊，孝事二亲内外谨善，不念诳佞心口相应，善权方便进退知时，可得作世间事，不得为世间意。」

阿难白佛：「何谓世间事？何谓世间意？」

佛言：「为佛弟子，可得估贩利业，平斗秤尺施行以理，不得阿枉巧欺以侵于人，葬送、移徙、婚姻、嫁娶是为世间事也。世间意者，为佛弟子不得卜问、请符呪魘怪、祠祀、解奏、畏忌不吉。受佛五戒者，是福德之人，无所畏避，有所施行当启三尊，无往不吉。戒德之人，道护为强，诸天龙鬼神无不敬伏；戒贵则尊，所往常安。不达之者，自作障碍。善恶由心祸福由人，如影追形如响随声，天无不覆地无不载；戒行之德福应自然，天神拥护感动十方，与天参德功勋巍巍，众圣嗟叹难可称量，智士达命没身不邪，善知佛教可得度世之道。」

阿难闻佛所说，便整袈裟头脑着地：「唯然，世尊！我等有福，得近如来耳馔法味，普恩慈大，愍念一切，为兴福田，令得脱苦。佛语至诚而信者少，是世多恶，众生相诅，多信鬼神背正向邪，天堂皆空地狱塞满，甚可痛哉！若有信者，或一若两，奈何世凋，乃当如此。佛灭度后，经法独存，少有行者；人民转伪，渐销沦替将衰灭矣。呜呼！痛哉！复何恃怙？唯愿世尊，为诸晚学留神显化，未可般泥洹。」

阿难因进颂曰：

「佛为三界护，	恩广普慈大，
愿为晚学类，	未可取泥洹。
痛矣未达者，	瞢瞢不别真，
法鼓震三千，	云何不得闻？
世浊诸恶人，	自还堕颠倒，
不信世有佛，	自作众罪本。
命尽往地狱，	刀剑解其身，
祠祀好杀生，	镬汤涌其中；
淫泆抱铜柱，	大火相烧然，
诽谤清高士，	铁钩拔其舌；
乱酒无礼节，	洋铜沃其口，
若生还作人，	痴騃无义方。

不杀得长寿， 无病常康强；
不盗后大富， 钱财恒自饶；
不淫香净洁， 身体鲜苾芬；
至诚不欺诈， 为人所信承；
不醉得聪明， 众人所尊敬。
五福超法出， 天人同俦类，
所生亿万倍， 真谛甚分明。
痴愚不别道， 蔽圣毁正觉，
死入无择狱， 头上戴铁轮。
求死不得死， 须臾已变形，
矛戟相贯刺， 躯体相残截。
矇矇不达事， 恶恶相牵拘，
展转众徒趣， 禽兽六畜形，
为人所屠割， 以肉偿宿怨，
无道堕恶道， 求脱甚为难。
人身既难得， 佛法难得闻，
世尊为众佑， 安住之特尊。
敷遗甘露法， 晚学普奉行，
哀我现深慧， 愍念群生故。
开悟示地道， 行者得度脱，
福人在向向， 见谛乐不生。
自归安仁圣， 殖种不死路，
恩慈无过佛， 神妙现威光。
愿使一切人， 得服甘露浆，
慧船到彼岸， 法磬倡三千。
彼我无我想， 众佑转法轮，
我等蒙嘉庆， 得舍十二缘，
欢喜稽首拜， 自归最无上。」

阿难稽首颂已，诸会大众得不回还，心意开解，僧那大铠志无上道，甘露之音，香熏十方。示现地道为作桥梁，国王、臣民、天龙、鬼神，闻佛所说，阿难所颂，且悲、且感、且叹、且喜，稽首佛足，及礼阿难，受教而去。

佛说阿难问事佛吉凶经

【经文信息】 大正藏第 14 册 No. 0492a 佛说阿难问事佛吉凶经

【版本记录】 CBETA 电子佛典 Rev. 1.11 (Big5), 完成日期: 2009/04/23

【编辑说明】 本数据库由中华电子佛典协会 (CBETA) 依大正藏所编辑

【原始数据】 萧镇国大德提供, 维习安大德提供之高丽藏 CD 经文, 维习安大德提供, 北美某大德提供, Jasmine 提供新式标点

【其他事项】 本数据库可自由免费流通, 详细内容请参阅 [【中华电子佛典协会数据库版权宣告】](#)
